

# Parosifa erup fain Pol- ke wi Tesalonaika wia siisimomak

## Miimow opora

Wi Tesalonaika Kristen teeria Krai ikoka nainiw ekapowa nain maa mauwa-ke imenarion, wi nain kema unu-unowa wuamik. Ne mua papako-ke maemik, “Krais iiriw ekapok.” Naapeya Pol opor makena wia maakinen naep parosifa wia siisimomak. Feenap wia maakek, fofa nain eewuar. Kiikir akena miiw emeria mua emina kekan-afurap sira samo-samora onikuan. Ne mua oko, Mua Maneka sira fien-afuriya nain pun ariman arinon. Ariman arep Krai iuwuaremi porainon. Naap wia maakemik.

Aria fain pun wia maakemik, ni kekanep Mua Maneka opora opam-ikok pina unowa eliw akuawowen, naap wia maakemik. Ona ne ona uuwow epaskun anane wiam baliwam-ikemik naap, wis pun naap oneka wia naemik. Wi uuwowa nain me lebumaruk, ne emeria mua oko wia asipowa pun me lebumaruk, nain wia maakemik.

---

**1** <sup>1</sup>Aria i yiam arow, Pol, Sailas ne Timoti, i naap parosifa fain ni Tesalonaika nia siisimomimik, ni eena yiena Auwa Mua Maneka ne yiena Maneka Yeesus Krai teeria-pa wiar ikeman nain. <sup>2</sup>I feenap nia maimik, yiena Auwa Mua Maneka yiena Maneka Yeesus Krai ikos nia kemalep nia asipiwkin ni kema sonom eliya ikowen.

## Mua Maneka faremi sira eliya naakowa

<sup>3</sup>Aria emar unowik, ni kekanep Yeesus Krai opora opap baliwep ookiman nain naap onami opora opa-afuriman. Ne ni unowiya niam kookalep niam saliwami baliwep akena niam wuiman. Naapeya i ni muuta nain anane Mua Maneka faremi sira eliya naakem-ikowa-ke. Nain pepek. <sup>4</sup>Ni nia samo-samorami sirirowa niiwkin samor akena aawem-ikaiman, nain ni kekanep opora naap opam-ikaiman. Naapeya i Yeesus Krai teeria kame unowa wiar ikiwimik nain kemelap ni nia maemi unuma nia pirimik.

<sup>5</sup>Ni Mua Maneka pika kemena-pa ikeman muuta nain sirirowa aawiman. Nain onoma feenap, Mua Maneka-ke nia mainok, “Aa, ni pepeke.” Naapeya naneka, Mua Maneka i baliwep yia pupep eena yia maiya nain makena-ke. <sup>6</sup>Moram o sira kaken akena ookiya, wi eena sirirowa niimik nain os-ke ikoka kiripami sirirowa wiinon. <sup>7</sup>Ne ni sirirowa aawiman nain nia saliwami kema sonom eliwa niinon. Ne is pun sira naap yia oninon. Nain ikoka yiena Maneka Yeesus owow iinan-pa ona ensel kekanowa wiamiya oromi naap yia oninon. <sup>8</sup>O mukun wilinowa onaiya oromi wi mua Mua Maneka makena-ke me naep yiena Maneka Yeesus opor eliwa me wiar ookimik nain sirirowa maneka wiinon. <sup>9</sup>Wi mua nain yiena Maneka epasia-pa wia wueya o kekanowa maneka ne parin onaiya ikua neeke me wiar ikaikuan. Wi nain anane maneka sirirowa naap aawem-ikaikuan, weeserowa marew. <sup>10</sup>Fofa eena Yeesus ekapiya neeke ona teeria o opora wiar opap ikemik nain-ke unuma wiar pirami kemelikuan. Neemi o kakaikuan. Ne ni i opora nia maakemik nain opaman, naapeya iir nain nis pun wi nain wiamiya ikok kemelowen.

<sup>11</sup>Naapeya i nain kema suuwap ni feenap ikeka naep Mua Maneka farem-ikaimik. Os-ke nia fareya ona teeria-pa wiar ikeman nain ni kakeniw ikaiwkin nia mainok, “Aa, ni pepeke.” Neemi sira ele-eliwa onowa kemaiw ikeman nain ona nia kekanowam-ikaeya ni naap onam-ikowen. Ne ni Yeesus opor makena wiar opap uuwiman nain pun nia asipami baliwep nia silewominon. <sup>12</sup>Ni naap onam-ikaiwkin yiena Maneka Yeesus Krai unum maneka aawinon. Ne nis pun o wameiya ikok o muuta nain unum maneka aawowen. Nain Mua Maneka ne yiena Maneka Yeesus Krai ikos nia kemalep naap nia asipiwkin ni naap ikowen. I maa unowa nain naep Mua Maneka farimik.

### **Mua samor akena nain ikoka imenarion**

**2** <sup>1</sup>Aria emar unowik, yiena Maneka Yeesus Krai nainiw ekapep i unowiya yia fiirimeya o miir onoma-pa wiar ikowa nain, i feenap mau naep. <sup>2</sup>I feenap niar miimamik, mua papako-ke maimik, “I Ewar Eliwa-ke kema yiek nain feenap, Yeesus Krai ekapowa epa aakisa fanek.” Ne papako-ke maimik, “Pol ame pun parosifa-pa naap maemik.” Ne oko pun, “Wi mua-ke Mua Maneka opora yia wafuromami naap maimik.” Naap nia maakiwkin-na miimap me soraneka, ne kema me tootoneka. <sup>3</sup>Wi naap nia momorimik nain opora me wiar miimeka. Epa nain eewuar ikua. Sira fain kiikir imenarion. Feenap, mua unow akena emina kekan-afurap Mua Maneka mikikira iwikuan. Ne mua eena Mua Maneka sira iiwawun wiar fieniya nain pun ariman arion. O ikoka epa samora neek ikok sirirowa maneka aawem-ikowa nain-ke. <sup>4</sup>Os-ke yo yaisow naemi wi inasina unowa wia maemi wia farimik nain iinan wia irami wame

pirinon, ne Mua Maneka unuma pun naap porainon. Neemi Mua Maneka tempel koora wiar ikiwep o epa neeke wiar pokap ikok mainon, “Yo Iinan Mua Maneka-ke,” naap wame mainon.

<sup>5</sup>Yo iiriw niamiya ikok maa unowa nain nia maakem-ikem. Ni nain me kema suuwiman-i? <sup>6</sup>Ne ni fain pun amisareman, aakisa maa okoke mua samora imenarowa era wiar puukap ikua. Ikoka ona epa eena Mua Maneka wuomak nain pepeke ereya o ariman arinon. <sup>7</sup>Ne aakisa Mua Maneka opora iiwawun wiar fienow sira nain-ke kokot uuwam-ikaia, nain ewur me ariman arinon. Mua Maneka-ke mua eena era wiar puukap ikua nain epa wue naakeya sira nain manekaremi epa unowa fiifinarinon. <sup>8</sup>Iir nain akena mua samora nain ariman arinon. Naap ikaeya yiena Maneka Yeesus-ke oromi ona opaimik yoowa-pa ifakiminon. Ona parin maneka nain-pa o iiwawun samorami weeser-wuininon.

<sup>9</sup>Aria mua eena Mua Maneka opora iiwawun fieniya nain Satan kekanowa onaiya ekapinon. Ekapemi kekanowa wia ofakowami maa miililina sira-sira oninon. Ne wia peeskimemi maa sira onaiya akena nain onami kema wia mikinon. <sup>10</sup>Wi mua eena opor makena ookowa miatinep Mua Maneka wameiya eliwa ikowa nain wiena sisina-pa wiam wuamik. Naapeya wi umep mesenalowa-ke. Ne mua nain-ke wadol sira-sira onami wi mua nain wia peeskimemi wia momorinon. <sup>11-12</sup>Wi opor makena miimowa miatinep sira samora onowa kema nain manekiw ikemik. Naapeya Mua Maneka-ke kema wiar iiwkeya opor wadola nain makena-ke naep ook-ikiwem-ikemik. Naeya wiena pina neeke wia mekawami wia samorinon.

<sup>13</sup>Emar unowik, ni Mua Maneka nia kookaliya nain-ke. O nia aawowa naep mokomokoka nia nanikak, naeya Ewar Eliwa-ke nia baliweya ni kema dubil maneka ikok opor makena ookami anane eliw ikowen. Naapeya i ni muuta nain anane Mua Maneka sira eliwa naakem-ikowa-ke. <sup>14</sup>Os-ke yiena Maneka Yeesus Krai parina ne kekanowa-pa wiar ikeka naep nia farek. Naeya i Yeesus opor eliwa nia maakemkun ni opiwkin nia aawep ona teeria-pa nia wuak.

<sup>15</sup>Naapeya emar unowik, ni kekanep opor makena yiena kakeniw opaimika-pa nia maakemik nain, ne parosifa-pa nia maakimik nain opa-afureka.

<sup>16-17</sup>Mua Maneka yiena Auwa eena yia kemalep kema yia iikirowam-ikaeya maa ikoka imenarowa nain kemaiw ikok makena yia opominon naimik. Naeya i o faremi feenap nia naimik, yiena Maneka Yeesus Krai ne yiena Auwa Mua Maneka ikos nia kekanowami kema nia iikirowiwinon ni opor eliwiw niam maakemi sira eliwa-pa niam aawem-ikeka.

**I yia kema suuwap Mua Maneka farem-ikeka wia naek**

**3** <sup>1</sup>Aria maa oko feenap, i yia kema suuwap yiena Maneka anane farem-ikeka. Naeya i o opora eena wia maakimik nain ewur

karuemi manekarinok, ne mua unowa opora nain eliw akena-ke naep opuk, ni iiriw onaman naap. <sup>2</sup>Nain me mua unowiya Yeesus Krai opora wiar opimik. Naapeya ni Mua Maneka faremi nokarem-ikeka, naeya wi mua samora eena yia samoru naep onimik nain os-ke umua-pa pika yia opomaya samor me aawiyen.

<sup>3</sup>Yiena Maneka makena-ke, yia asipowa maiya nain naap oninon. Ona nia kekanowami pika nia warikeya Satan nia samorekam naep oniya nain, ni me samor aawowen. <sup>4</sup>Ne i feenap nia maimik, makena, yiena Maneka-ke nia kekanowam-ikaeya i opora nia maakemik nain aakisa yiar ookam-ikaiman. Ne pun naap ookam-ikowen.

<sup>5</sup>Naapeya i Mua Maneka faremi feenap nia naimik, yiena Maneka-ke kema eliwa-pa nia pikiweya Mua Maneka yia kookaliya nain baliwep wiar furewowen. Ne Krai nia kekanowam-ikaeya naap ikowen.

### Ni kekanep uuweka, me lebumareka

<sup>6</sup>Aria emar unowik, yiena Maneka Yeesus Krai unuma-pa opor kekanowa fain niimik. Feenap, i opora nia maakemik nain ni teeria mua papako opora yiar ookowa lebumarep oram maneka yiauwimik. Wi nain wiamiya me ikeka. <sup>7</sup>Moram i iiriw ni niamiya ikemik nain me lebumarem-ikemik. Neeke sira yiar urufap maeman, “I sira naap nain wiokowa-ke,” naeman. <sup>8</sup>I mua oko maa enowa oram-ko me wiar aawem-ikemik, weetak. I wiar sesenarem-ikemik. I mia me nia teeku naep anane amirika ne uura uuwowa erup-erup uuwam-ikemik. I uurarowa marew, kerew akena uuwamik. <sup>9</sup>Nain me maa enowa oram niar aawowa me pepep pun yiena uuwam-ikemik, weetak. I eliw nia maakemkun enowa yia urufam-ikekaman, nain i naap me onamik. Moram nis pun i sira yiokeka naep naap onamik. <sup>10</sup>Ne pun i iiriw ni niamiya ikok feenap nia maakem-ikemik, “Mua eena uuwowa miatinimik nain maa orawin me wienakeka.”

<sup>11</sup>Nain i feenap nia miimamik, ni teeria mua papako wiena maa kakeniw me uuwowa wiena oram paapar-yiauwimik. <sup>12</sup>Naapeya aakisa yiena Maneka Yeesus Krai unuma-pa wi mua naap nain opor kekanowa wia maakimik, wi baliwep ikok wiena kakeniw mauwap enowa imenam-ikauk. <sup>13</sup>Ne ni papako sira eliwa onam-ikaiman nain naap onam-ikeka, me lebumareka.

<sup>14</sup>I parosifa nia sesekomimik fain ni teeria mua-ko opora me yiar miiminon-na mokokiwi me ikeka. Feenap oneka, wameiya me wiar areka. Ni naap oniwwin emina ururinok. <sup>15</sup>Nain me iwwawun iirareka, weetak, os pun yiena teeria-ke naep baliwami ariman maakeka.

<sup>16</sup>Aria i feenap nia naimik, yiena Maneka eena kema eliwa yiyi nain nia sonomaya maa mauwa niar imenariya nain ni kema sonom eliwik ikowen, anane maneka. Yiena Maneka ni niamiya ikainok naimik.

<sup>17</sup>Aria opor ara fain yo Pol-ke yena kakeniw wapena-pa ni eliw ikeka nia naemi siisimem. Yo parosifa unowa siisimiyem nain yena wapen siisia efar ikomakek, nain yo efa ilenowa-ke. <sup>18</sup>Aria yo feenap nia naiyem, yiena Maneka Yeesus Krai ni nia kemalep nia asipam-ikainok.